

# SARDUS LIBERUS

## MEDAS, ABISTUS, IMPARIS PO SA NATZIONI SARDA.

*In Aristanis, sa tzitadi de Lionora de Arbarei, dominigu su 16 de su mesi de Paschixedda de su 2018, si funt atobiadas is delegatzionis de is movimentus politicis, assòtzius e personalidadi de sa sotziedadi tzivili po firmai su Manifestu de Libertadi e de Arrenàscida de sa Sardinnia.*

*Unu disafiu natzionali, culturali, politicu e sotziali aundi is Sardus funt protagonistas e faidoris de su benidori insoru.*

\*\*\*\*\*

*Sa libertadi de su pòpulu sardu est su prus disafiu mannu, cumpriu, abetau e netzessàriu po s'emantzipatzioni politica, econòmica, sotziali e culturali de Sardinnia. Unu disafiu mannu meda e aguditziosu po ndi scabullu sa Sardinnia de dònna genia de abusu; po avalorai is potenzialidadi culturalis, econòmicas e sotzialis nostas schetas; po nosi podi auto-determinai e essi primus atoris in is scioberus de su benidori nostu.*

*Sardi Liberi po sa libertadi de su Pòpulu Sardu est unu progetu modernu e de importu po s'Arrenàscida de sa Sardinnia.*

*Sa proponimentu, abertu a s'acaramentu liberu e partitzipau, nascit de su spèddiu de auniri is sardus liberus, torraus a tzerriai a s'unidadi de un'arrèxini natzionali funguda forti, capassa de lassai a una parti is eredadis ideològicas de su noixentus e auniri is mellus fortzas po s'interessu esclusivu de su Pòpulu Sardu.*

*Su primu presupostu de custu manifestu natzionali est sa Libertadi de su Pòpulu Sardu.*

### 1. LIBERTADI DE S'ABISÒNGIU.

S'obietivu primàrgiu est s'emantzipatzioni politica, econòmica, sotziali e culturali de is Sardus. Boleus chi is giòvunus potzant tenni sa possibilidadi de s'ghiri a bivi traballendi in sa terra insoru, e no essi obrigaus a si-nd'andai de Sardinnia po circai traballu e benidori.

Custu fait a ddu fai gràtzias a unu pianu straordinàriu po su traballu chi persigat atzionis lestras po arrenguitzai a s'assuntzioni e a sa formatzioni, furriau a is impresas piticas, mesanas e mannas de Sardinnia, finsas cun sa creadura de sa zona franca integrali;

### 2. LIBERTADI DE PROGRAMAI.

Po detzidi nosu etotu is atzionis de portai ainantis po unu progetu epocali de echilibriu econòmicu nou, cun atzionis de mesuramentu de su gap e de sa cumpensazioni sua, po su chi pertocat infrastruturas, fiscalidadi e economia. Su PARIS (Pianu de Assètiu de Re-echilibriu Insulari nou de Sardinnia) est sa prus proposta econòmica e sotziali annoadora e adelantada po fai torrai a nasci sa Sardinnia;

3. LIBERTADI DE NDI PESAI SU BENIDORI NOSTU. Puntendi a s'avaloramentu de sa terra nosta, de sa laurera a sa pastoria, de su turismu a s'archeologia, de sa Innovation Technology a sa cultura, de sa cumèrciu a s'artesanai;

### 4. LIBERTADI DE DEFENSAI SA TERRA NOSTA.

Libertadi po su Pòpulu nostu de is discriminatzionis e tzerachias italianas e europeas, seghendi is cadenas chi ant firmau e s'ghint a firmai su svilupu e sa crèscida de Sardinnia;

### 5. LIBERTADI DE SI PODI MOVI.

Chena de peruna discriminatzioni, asseguendi a sa Sardinnia ugualis cunditionis universalis de mobilitadi, boghendi-nci monopòliis e speculatzionis in terra, àiri e mari;

### 6. LIBERTADI CULTURALI.

Po si-ndi scabullu de su giali de sa tzerachia, po punnai a s'avaloramentu de sa lingua nosta e finsas in s'amparu de sa sienda culturali, archeològica e stòrica, disconnota cun nexi manna, cuada e privada de s'importàntzia cosa sua in s'imaginàriu nostu, po nexi de una classi dirigidora bona a fai nudda e acapiada a àterus orizzontis;

### 7. LIBERTADI FISCALI.

Po produci arricchesa noa, arregulendi is impostas a is abisòngius de s'economia nosta po una fiscalidadi giusta;

### 8. LIBERTADI DE SI MOVI A LIVELLU INTERNATZIONALI.

Po una Sardinnia arresponsàbili cun sa creadura de una struttura tènnica bona a istituiri e fatzilitali is arrelatas econòmicas, políticas e culturalis cun is pòpulus de totu su mundu. Sa tenta est sa de acapiari aparì is tretus stràtègicus de su sistema econòmicu: tragus, laurera, produsidura, cumèrciu, tennologia, energia, turismu e de avalorai su grandu capitali umanu, culturali e professionali de is sardus in su mundu, fillus de Sardinnia, sardus disterraus de dònna generatzioni: in sa Sardinnia chi nosu bisaus is Sardus de sa diàspora depint torrai a essi protagonisti de su benidori de sa terra nosta;

### 9. LIBERTADI DE ATRAI CAPITALIS.

Po ingendrai una crèscida infrastruturali lestra de s'isula asseguendi su controllu pùbricu cumpriu de is faidoris printzipalis de sa produsidura, de s'arretza infrastruturali finsas a cussa de is serbitzius;

### 10. LIBERTADI DE TENNI UNA SANIDADI GIUSTA E S'AMPARU SOTZIALI.

Po lompi a livellus de assistèntzia e de cura de primori e podi fai acostai e no stesiai is malàdius de sa sanidadi sarda;

### 11. LIBERTADI DE FAI

Aprontendi sa prus arrevoluzioni burocràtica de importu de s'era moderna, burrendi totu is protzeduras chi no serbint a nudda favoressendi su printzipiu de s'arresurtau;

### 12. LIBERTADI DE INCHISIRI IS ALLUADORIS.

Po programai sa prus òbera de importu de bonifica e torradura a comentu fut innantis su logu me is àreas industrialis imbrutadas e de cuddas militaris, torrendi a is Sardus is sartus illacanaus furau a sa comunidadi po interessus allenus e a su svilupu e a s'ocupatzioni de su territòriu.

\*\*\*\*\*

Sa Libertadi de su Pòpulu Sardu est s'orizonti de una comunidadi capassa de costruiri s'arrescatu suu etotu cun sa conca e cun su coru. Custa "pintura" po sa terra nosta nascit de s'apretu de auniri totu cussas fortzas natzionalis sardas, políticas e sotzialis, chi tenint comentu de prioridadi sa Sardinnia e su Pòpulu cosa sua. Est unu progetu po totu is Sardus Liberus chi s'atrevint a portai ainantis unu disafiu mannu e annoadori po su governu de Sardinnia. Unu progetu chi punnat a auniri rivoluzionàriu e moderaus, po lompi cun forza e determinu a sa Libertadi de Sardinnia e de su Pòpulu Sardu. A custu spèddiu tocat a dd'acostai alientu e determinu, sperientzia e sintzillesa.

## SARDUS LIBERUS

Medas, Abistus, Imparis  
Po sa Natzioni Sarda